



SAKSPAPIR

Saksnr	Utval	Type	Dato
28/2018	Levekårsutvalet	PS	24.09.2018

Sakshandsamar	Arkiv	ArkivsakID
Ann Kristin Bolstad	FE - 143, FA - A00	18/1123

KOMMUNEDELPLAN OPPVEKST - ARBEIDSPROSESS OG TEMA I PLANPROGRAM

Rådmannen sitt framlegg til vedtak:

Levekårsutvalet tek saka til orientering og følgjer opp med drøfting av arbeidsprosessar og tema til planprogrammet for kommunedelplan oppvekst.

Levekårsutvalet oppnemner som saksordførar.

Levekårsutvalet - Sak 28/2018

LEV - Behandling:

Framlegg frå Evelyn Boge på vegner av SV, MDG, H:

Kommunedelplan oppvekst tek utgangspunkt i skulestruktur som vedteke i sak 60/2016.

Framlegg frå Magne Hestad:

Hege Eide Vik vert saksordførar.

Kommunalsjef oppvekst orienterte.

Røysting:

Det vart først røysta over første del av framlegg til vedtak - dette vart samrøystes vedteke.

Framlegget frå Magne Hestad om saksordførar vart samrøystes vedteke.

Framlegget frå Evelyn Boge vart vedteke med 4 røyster (SV, H, MDG, SP)

LEV - Tilråding/Vedtak:

Levekårsutvalet tek saka til orientering og følgjer opp med drøfting av arbeidsprosessar og tema til planprogrammet for kommunedelplan oppvekst.

Levekårsutvalet oppnemner Hege Eide Vik som saksordførar.

Kommunedelplan oppvekst tek utgangspunkt i skulestruktur som vedteke i sak 60/2016.

Saksopplysningar:

Kort om saka

I samsvar med *Kommunal planstrategi for Vaksdal 2016 - 2020* skal det utarbeidast ein ny kommunedelplan for oppvekst. Kommunedelplan oppvekst er ein plan etter plan- og bygningslova § 11. Det gjeld same krav som kommuneplan, men avgrensa til tenesteområdet oppvekst. Det må utarbeidast eit planprogram

Heimel

I medhald av plan- og bygningslova § 11-12 vedtok Formannskapet i Vaksdal, 03.09.2018, oppstart av planarbeid for Kommunedelplan Oppvekst. Formannskapet ber Levekårsutvalet handsame drøftingssak om arbeidsprosess og tema til planprogram og om å oppnemne ein saksordførar. Politisk styringssystem og delegeringsreglement for Vaksdal kommune.

Bakgrunn

Utgangspunktet til kommunedelplan oppvekst vert teke i den kommunale planstrategien og Samfunnsdelen til kommuneplanen som er vedtatt i Kommunestyret, og ein legg retningslinjer og pålegg frå statlege og regionale myndigheiter til grunn. Ein skal ta stilling til langsiktige utfordringar, mål og strategiar for kommunesamfunnet som heilheit og kommunen som organisasjon. Kommunedelplan Oppvekst dannar grunnlag for verksemd og planar innan tenesteområdet. Planen skal ha ein handlingsdel for 4 år eller meir. Handlingsdelen skal reviderast årleg. Økonomiplanen skal omhandle eller legge føringar for handlingsdelen.

Kommunedelplanen skal erstatta *Kommunedelplan Oppvekst mot 2020*. Endringar i rammevilkår, demografi, tenestebehov og nye statlege føringar og lovendringar aukar behovet for ein ny overordna og heilskapleg plan. Planen skal fange opp behov for utvikling i tenester og organisasjonen, og skal bygge på eit breitt kunnskapsgrunnlag.

Det første steget i planprosessen vert å utarbeide eit planprogram, jf. plan- og bygningslova §11-13.

Planprogrammet skal vise og gjera nærare greie for:

- rammer og føringar for planen
- føremålet med planarbeidet
- gjennomføring av planarbeidet i forhold til fristar og medverknad
- utfordringar og strategiske val
- prioriteringar og avgrensingar

Planprogrammet skal leggjast ut til høyring og offentleg ettersyn i minimum seks veker og kommunen vurderer merknadene som kjem inn før endeleg planprogram vert fastsett. Sjølv planen skal utarbeidast etter det fastsette planprogrammet.

Vurdering

Levekårsutvalet har tenesteområdet for oppvekst som sitt ansvarsområde. Det heiter i reglementet at « Utvalet har særleg ansvar for at det vert utarbeidd gode målsetjingar, planar og andre styringsdokument for tenestene innan utvalet sitt arbeids- og ansvarsområde.»

Føremålet med kommunedelplan oppvekst er blant anna å sikra at måla i [Kommuneplanen sin samfunnsdel 2017 – 2028](#) vert oppfylt. Verdiane som skal danna grunnlag for utviklinga i kommunen er Samahald – Nyskapande – Open.

Eitt av kommunen sine hovudmål er at *Vaksdal kommune skal vera ein inkluderande og trygg stad å bu for alle*. Delmålet for Oppvekt her:

Trygge og utviklande oppvekstvilkår for barn og unge

Strategiar:

- Trygg ferdsel mellom viktige funksjonar i kvardagen
- Møteplassar som inviterar til leik og aktivitet
- Skular og barnehagar som bidreg til utviklande og gode læringsmiljø

Nasjonale mål er blant anna heimla i Opplæringslova og Barnehagelova med forskrifter.

I 2017 kom ny rammeplan for barnehage og i 2020 skal revidert læreplan for grunnskulen vera klar. Både rammeplan og læreplan skildrar tverrfaglege tema som vil vera grunnleggjande i framtidas barnehage og skule for å nå formålet for oppvekst om å «...opne døra mot verda og framtida...» for borna våre. Dei tverrfaglege tema er:

- Livsmestring og folkehelse
- Demokrati og borgarskap
- Bærekraftig utvikling

I [**NOU 2015: 8 - Fremtidens skole er følgjande**](#) kompetansar sett som viktige at born og unge tileigna seg for framtida:

- Å kunne kommunisera, samhandla og delta
- Å kunne utforska og skapa
- Kompetanse i å læra
- Fagspesifikk kompetanse

Born og unge si utvikling av kompetanse innanfor sentrale fag og fagområder vil vera viktig i framtida. Born og unge vil ha behov for å tileigna seg ny kunnskap og videreutvikla det dei kan. Barnehage og skule må difor utvikla born og unge sin kompetanse i å læra. At born og unge lærer å kommunisera, samhandla og delta auka i betydning, for både samfunnet og den enkelte, og er avgjerande for å skapa eit godt læringsmiljø. Barnehage og skule må òg bidra til at born og unge lærer å utforska og skapa. Det er viktig for at dei skal kunne bidra i arbeid og samfunn og vera med på å utforska og finna løysningar på nye utfordringar. Samla vil desse kompetanseområda reflektera barnehagen og skulen sitt samfunnsoppdrag.

I prosessen fram mot strategiske val og prioriteringar i planprogrammet vil rådmannen presentera aktuelle utgreiingar og statlege føringar, samt lokale rapportar, analysar og vurderingar. Dette for at Levekårsutvalet skal kunne ha gode dialogar og drøftingar om aktuelle tema før strategiske val og prioriteringar i planprogrammet vert gjort.